

Nassitsissummik, mellembølge-kkut
nassitsissummut
atorunnaarsinneqartumut taartissamik
pilersitsinissaq pillugu nassuiaat

Imai

Eqikkaaneq	3
Aallaqqaasiut	5
Ataatsimiititaliap suliakkiinera	6
Nassuiaatip ilusiligaanera	7
Innuttaasut eqqorneqartut amerlassusii.....	7
Eqqorneqarnerpaajusut.....	7
Eqqorneqannginnerpaajusut.....	8
Eqikkaaneq	8
Teknikkikkut aaqqiissutissat	9
Mellembølgekkut nassitsissutit aqqutigalugit radiukku aallakaatitsineq	9
Kortbølgekkut nassitsissutit aqqutigalugit radiukku aallakaatitsineq.....	10
Qaammataasatigut radiukku aallakaatitanik tigooqqaaneq	12
Eqikkaaneq	13
Nassitsissutinik ikkussuineq ingerlatsinerlu	14
Aningaasaqarnermut sunniutissat.....	15
Aningaasalersueriaasissat.....	16
Akuersissummik pigisaqartup aningaasartuutissanut akileeqquneqarnissaa.....	16
Pisortat aningaasalersuinissaat	17
Atuisut aningaasalersuinissaat	17
Najoqqutassaq ataatsimoortitsiviusoq.....	18
Eqikkaaneq	19

Eqikkaaneq

Naalakkersuisut nassitsissummik mellembølge atorlugu nassitsissummut atorunnaarsinneqartumut taartissamik pilersitsinissamut periarfissanik nassuiaateqarfiusumik nassuiaasioqqullugit peqquneqarput. Nassuiaammi kikkut nassitsissutinik matoqqaanermit eqqorneqarnersut, teknikkikkut taartissatut periarfissat suut pigineqarnersut, aammalu taartissamik pilersitsinermi aningaasaqarnikkut sunniutissat qanoq isikkoqarnersut nassuiaatigineqarpoq. Aningaasaqarnermut sunniutissanut tunngatillugu aamma aningaasalersueriaatsit atorneqarsinnaasut suunersut qulaajarneqarput.

Innuttaasut eqqorneqartut

Innuttaasut eqqorneqartut amerlassusaannut, nassuiaammi takuneqarsinnaasunut tunngatillugu innuttaasut eqqorneqarnerpaajusunut eqqorneqannginnerpaajusunullu agguarneqarput.

Eqqorneqannginnerusunut inuit, angerlarsimaffimmini FM-ikkut nassitsissutinik tigooqqaasinnaasut, kisiannili pinngortitami radiukkut tusarnaarsinnaanngitsut ilaatinneqarput. Taakku amerlassusii nikerartuupput, kisiannili eqqorneqarnerpaajusuniit angerlarsimaffimmini radiukkut tusarnaarsinnaanngitsunit amerlanerungaatsiarput.

Teknikkikkut aaqqiissutissat

Teknikkikkut aaqqiissutissanut tunngatillugu periarfissat assigiinngitsut toqqarneqarsinnaapput: Nassuiaammi mellembølgekkut nassitsissutinik, kortbølgekkut nassitsissutinik aammalu qaammataasakkut radiup aallakaatitaanik tigooqqaassutinik ikkussuinermit iluaqutissat ajoqutissallu nassuiarneqarput.

Mellembølgekkut nassitsissutit atorlugit tigooqqaasinnaaneq pitsaalluurtuuvoq, kisiannili aaqqiissutissaq taanna akisungaatsiarpoq, nassitsissutit tallimat pilersinneqarnissaat pisariaqartussaammat. Kortbølgekkut nassitsissutit atorlugit aaqqiinissaq akikinneruvoq, nunalu tamakkerlugu atorneqarsinnaalluni. Ajoraluartumik tigooqqaasinnaanerup pitsaassusia appasinneruvoq, aammalu ullormiit ullormut allanngorartuulluni, tasanilu ullut ataasiakkaat radiukkut tusarnaartoqarsinnaanngivittarpoq. Qaammataasat aqquugalugit aaqqiinissat siunertamut tulluutinnngillat. Atortut angallattakkat atorlugit aaqqiissutissat radiukkut toqqaannartumik tusarnaarnissamut båndbreddet annikippallaarput, arlallillu qarasaasiamik imaluunniit tigooqqaassutinik angisuunik atuisinnaanissamik pisariaqartitsiviupput. Aamma qaammataasat aqquugalugit aaqqiissutissat akisoorujussuupput, tigooqqaassutinik pisinissamut aningaasartuutissat amerlammata, aallakaatitanik nassitsinermut akitsuutit qaffasimmata, imaluunniit taakku ataqatigiissinnerannik pisoqarmat.

Taamaattumik aqqiissutissatut toqqarneqarsinnaasut taamaallaat mellembølgekkut aamma kortbølgekkut nassitsissutinut tunngasuupput, taakkulu iluaqutissartaat ajoqutissartaallu matuma siuliani nassuiarneqarput.

Aningaasaqarnermut sunniutissat

Mellembølgekkut nassitsissutit atorlugit aaqqiissutissat sananeqarnissaat 18.375.000 koruunit missaannik akeqarput, tamatumalu kingorna ingerlanneqarnerinut ukiumut 3.565.000 koruunit missaanniittut atorneqartartussaapput.

Kortbølgekkut nassitsissutit atorlugit aaqqiissutissat sananeqarnissaat 4.975.000 koruunit missaannik akeqarput, tamatumalu kingorna ingerlanneqarnerinut ukiumut 500.000 koruunit missaanniittut

atorneqartartussaapput. Tassalu kortbølgekkut nassitsissutit atorlugit aaqqiissutissat sananeqarnissaat 13.400.000 koruunit missaannik akikinnerupput, ukiumullu ingerlanneqarneri 3.065.000 koruunit missaannik akikinnerullutik.

Aningaasalersueriaasissat

Aningaasalersuinissamut periarfissat pingaarnertut assigiinngitsunut sisamanut avitaapput: Akuersissummik pigisaqartoq taartissamik pilersitsinissamut ingerlatsinissamullu Naalakkersuisunit peqquneqarsinnaavoq, pisortat aningaasalersuinerat, atuisut aningaasalersuinerat imaluunniit taakku kattunneqarnissaat atorneqarsinnaavoq.

Akuersissummik pigisaqartup akiliisinneqarnerata ajoqutissartaraa, aningaasartuutit TELE-p atuisuinit agguarneqartussaammata, taamaalillunilu akeqartitseriaatsimi nalunaarasuartaatitigut niueruteqarneq paasiuminaannerulersittussaallugu.

Pisortat aningaasalersuinerisa ajoqutissartaraa, aningaasartuutit pisortat aningaasaqarnerannut artorsartitsisussaammata, tamannalu atuisut aningaasalersuinerini atuutissanngilaq.

Atuisulli aningaasalersuinissaat arlalinnik ajoqutissartaqarpoq, tassani atuisut akiliisartut allallu akornanni immikkoortitsinissaq ajornarsisussaammat. Kiisalu atuisunut akiliititsisarnermi aaqqissuussineq aningaasanut akiligassiissutigineqartartunut naleqqiullugu aqunneqarnissaa akisusussaavoq.

Aallaqqaasiut

Kalaallit Nunaanni mellembølgekkut radiup tusarnaarneqarsinnaanera

Kalaallit Nunaanni mellembølgekkut radiup tusarnaarneqarsinnaanera 1958-imi aallartippoq, tassani nassitsissutit siulliit pilersinneqarmata. 1969-imi aamma 1978-imi atortut allilernerqarput, najugaqarfiit amerlanersaanni tusarnaarneqarsinnaalerlutik. Tusarnaarsinnaaneq naammaginartooq anguniarlugu Upernavimmi, Uummannami, Qeqertarsuarmi, Nuummi aamma Simiutami mellembølgekkut nassitsissutinik sanasoqarpoq¹. Mellembølgekkut nassitsissutit taakku pingaartumik KNR-radiup aallakaatitaanik ingerlatitseqqittarnermut atorineqarsinapput.

Nassitsissutit TELE Greenlandimit (matuma kingorna TELE-mit) ingerlanneqarput, tassanilu aamma atortut aserfallatsaaliorneqarnerat ingerlaavartumillu iluarsaanneqartarnerat akisussaaffigineqarpoq.

Mellembølgekkut nassitsissutinik atorunnaarsitsineq

Naluneqanngitsut mellembølgekkut nassitsissutit 2011-ip ukiuata affaata siulliup ingerlanerani atorunnaarsinneqarput. Piffissami atorunnaarsitsiviusumi tassani nassitsissutit amerlanerpaartaat ukiut 30-it sinnerlugit pisoqaassuseqarput.

Nassitsissutinik pilersuineri napparutit qisuit portusuut napparutinut qitiusunut aammalu napparutinut oqimaaloqutaqarfiusunut atorineqartut tunngavigineqarput. Taamaattumik mellembølgekkut nassitsissutit KNR-radiup aallakaatitaanik ingerlatitseqqittarnermut atorineqaannassappata, annertuumik iluarsaassineri mut atatillugu aningaasaliissutissanik amerlasuunik arlalinnik aningaasaliinissaq pisariaqartussaasimagaluarpoq.

Mellembølgekkut nassitsissutit atorunnaarneqarnissaat aalajangiunneqarmat, inuiaqatigiinni tusagassiornerup ilusia annertuumik allanngorsimavoq.

Tassalu taamanikkut mellembølgekkut nassitsissutit, innuttaasunut tusagassiornikkut neqeroorutaasut arlallit ilagiinnarpaat. Tassalu illoqarfiit nunaqarfiillu tamarmik FM-ikkut nassitsissutinik, aammattaaq KNR-radiup aallakaatitaanik ingerlatitseqqittartunit anguneqarsinnaapput. 2010-miit 2012-imut tv-kkut nassitsissutit digitaliusut atuutsinneqaleriartuaarnerini, tv-kkut kanalit neqeroorutigineqartut sisamanut amerlipput. Tv-kkut nassitsissutit digitaliusut atuutsinneqaleriartuaarnerini aamma FM-ikkut nassitsissutit, FM-radio stereo-nngorlugu tigooqqaasinnaalerfiusut piorsarneqarnissaat pilersaarutigineqarpoq. Piorsaaneq taanna ingerlaavartumik atuutsikkiartuaarneqarpoq, 2014-illu naanerani tamakkiisumik atuutsinneqalernissaa naatsorsuutigineqarpoq.

Tassalu KNR-radio periutsit assigiinngitsut marluk atorlugit siaruarterneqarpoq (FM aamma mellembølge), iluarsaassinissamillu pisariaqartitsineq matuma siuliani taaneqartoq tikinneqarmat, taamaalinerani

¹ Piffissap ingerlanerani aamma Tasilami mellembølgekkut nassitsissummik ikkussisoqarpoq, taannali 1980-ikkut naanerani FM-ikkut nassitsissutinik pilersitsineri mut atatillugu atorunnaarsinneqarpoq. Tamatuma saniatigut 2011-mi Tunumi kortbølgekkut nassitsissutit minnerusoq atorunnaarsinneqarpoq, taassumalu aasaanerani piniariartarfik ajutoornermi attaveqarnissamut radioavisillu aallakaatinneqartarneranut atorineqartussatut sullinneqarpoq.

aningaasaliiffissat taaneqartut inuiaqatigiit eqqarsaatigalugit illersorneqarsinnaanngitsut Naalakkersuisut naliliipput.

Illoqarfinni nunaqarfinnilu innuttaasut amerlanersaat FM-ikkut nassitsissutit imaluunniit tv-kkut nassitsissutit digitaliusut aqqutigalugit radiumik tusarnaarsinnaammata, mellembølgekkut nassitsissutinik atorunnaarsitsinerup kingunerisaanik innuttaasut pinngortitamiiinnerminni, aammalu imartani sinerissamut qanittumiinnerminni KNR-radiup aallakaatitaanik tusarnaarsinnaanertik annaavaat.

Nassitsissutinik matooqqaanermi isumannaallisaanikkut sunniutissat annikillisinniarlugit silassaq VHF-ikkut nassitsissutit aqqutigalugit ullup unnuallu ingerlanerani sisamariarluni aallakaatinneqartalerpoq. Tassalu atorunnaarsitsineq sinerissami radioqarfiit mellembølgekkut sullissinerannut sunniuteqanngilaq, atortut taakku assigiinngitsuummata. Taamaalilluni imaani ajunaalernerme isumannaallisaanermilu sullissinerit atorunnaarsitsinermit eqqorneqanngillat. Kiisalu sinerissami radioqarfiit suli ilaqtutanut il.il. attaveqarniaraanni atorneqartarnerat ingerlaannarsinnaavoq.

Ataatsimiititaliap suliakkiinera

Inatsisartut 2012-imi upernaakkut ataatsimiinneranni Inatsisartuni ilaasortaq Debora Kleist, Inuit Ataqtigiit, aalajangiiffisassatut siunnersuuteqarpoq, taannalu imm. 55-itut suliarineqarpoq. Aalajangiiffisassatut siunnersuummi mellembølgekkut nassitsissutinut atorunnaartunut taartissanik pilersitsinissaq kaammattuutigineqarpoq.

Aalajangiiffisassatut siunnersuutip siullermeerneqarnerani aalajangiiffisassatut siunnersuut Sanaartornermut Avatangiisinullu Ataatsimiititaliami suliarineqartussatut ingerlateqqinneqarpoq, Naalakkersuisullu kaammattuinerat tunngavigalugu siunnersuutip allanngortinneqarnissaanut inassuteqaat matuma kingulianiittoq saqqummiunneqarpoq:

Nunap ilaani ullumikkut radiokkut anguneqarsinnaanngitsunut innuttaasut KNR-ip aallakaatitaanik tusarnaarnissamut periarfissaannik isumannaarunniarlugit, mellembølgekkut nassitsissummut atorunnaartumut taartissatut nassitsissummik allamik pilersitsinissamut periarfissanik qulaajaanissamut allaaserisaqarnissamullu Naalakkersuisut suliniuteqaqqullugit Inatsisartut aalajangiiffisassaattut siunnersuut. Peqatigitillugu periarfissat taaneqartut aningaasatigut kingunerisassai allaaserisami erseqqissarneqassapput, tamakkulu qanoq aningaalersorneqarsinnaanerat nalilersorneqassalluni. Misissuinermit inerniliussat nassuiaatit Inatsisartunut nassiuunneqassapput, taannalu kingusinnerpaamik UKA 2012-p ingerlanerani agguanneqassaaq.

Tassalu ataatsimiititaliap suliakkiinerani nassitsissummik, mellembølge-kkut nassitsissummut atorunnaarsinneqartumut taartissamik pilersitsinissaq pillugu nassuiaasiornissaq, kiisalu atuisut eqqorneqartut amerlassusiinik paasiniaanissaq pineqarpoq.

Naalakkersuisut nassuiaasiaanni ataatsimiititaliap inassuteqaataa tunngavigalugu teknikkikkut aaqqiissutissanik aalajangersimanerusunik, aningaasaqarnermut sunniutissanik aningaasalersueriaasiusinnaasunillu paasiniaasoqarpoq.

Nassuiaatip ilusiligaanera

Matuma kinguliani nassuiaammi siullermik innuttaasut eqqorneqartut sammineqarput, tamatumalu kingorna teknikkikkut aaqiissuteqarnissamut periarfissat saqqummiunneqarlutik. Tamatuma kinguliani immikkoortoq, aningaasaqarnermut sunniutissanik sammisaqarfiusoq saqqummiunneqarpoq, aningaasalersueriaasissat assigiinngitsut saqqummiunneqarnerinik malitseqartinneqarluni. Nassuiaat naggaserlugu eqikkaaneq saqqummiunneqarpoq.

Tamatuma saniatigut nalunaarusiat marluk nassuiaammut ilaliussatut ilanngunneqarput. Nalunaarusiat taakku TELE-mit ilusiligaapput, aammalu teknikkikkut aaqiissutissatut periarfissanut tunngasuullutik. Tassalu ilanngussaq 1 teknikkikkut aaqiissutissatut periarfissanik eqqartuiffiuvoq. Ilangussami tassani mellembølgekkut nassitsissutit atorlugit aaqiissutissamut naleqqiullugu Kalaallit Nunaata kitaani tigooqqaasinnaaneq aallunneqarpoq. Ilangussaq 2 Nuup eqqaani Kitsissut kortbølgekkut nassitsissutinik inissiiffissatut atorneqarsinnaananut teknikkikkut nalunaarusiaavoq.

Innuttaasut eqqorneqartut amerlassusii

Inuit qanoq amerlatigisut mellembølgekkut nassitsissutit atorunnaarsinneqarnerinit eqqorneqarnerisut aalajangiiffiqineqassappat, eqqorneqarnerpaajusut eqqorneqannginnerpaajusullu immikkoortinnissaat pisariaqarpoq. Eqqorneqarnerpaajusut tassaapput inuit, mellembølgekkut nassitsissutit atorunnaarsinneqarnerisa kingorna angerlarsimaffimmini periaatsit allat atorlugit radiukkut aallakaatitanik tusarnaarsinnaajunnaartut. Eqqorneqannginnerpaajusut tassaapput inuit, illoqarfiit avataaniinnermini annaasaqarnerminnik misigisaqartut.

Eqqorneqarnerpaajusut

Eqqorneqarnerpaajusut ikittuinnaapput, tamatumunngalu illoqarfiit nunaqarfiillu FM-ikkut nassitsissutit imaluunniit tv-kkut nassitsissutit digitaliusut aqutugalugit KNR-radiup aallakaatitaanik tusarnaarsinnaanerit pissutaavoq. Qaanaami, Siorapalummi Ittoqqortoormiinilu FM-ikkut nassitsissuteqanngilaq, kisiannili sumiiffinni pingasuusuni taakkunani sionatigut mellembølgekkut nassitsissutit aqutugalugit radio tusarnaarneqarsinnaasimangilaq. Sumiiffinnili taakkunani najugaqartut sulii tv-tik aqutugalugit radio tusarnaarsinnaavaat. Taamaattumik inuit illoqarfinni nunaqarfinniluunniit najugaqartut tamarmik sulii angerlarsimaffimmini KNR-radio tusarnaarsinnaavaat.

Tamatuma saniatigut nunaateqarfinni avinngarusimasuni atugassarititaasut immikkut ittut tunngavigalugit atuisunngortoqarsinnaavoq. Neqeroorutit taakku VSAT-imut aaqiissutissanik taaneqartarput, taakkulu atorlugit tv-kkut radiukkullu aallakaatitat tigooqqarneqarsinnaapput, kiisalu angerlarsimaffimmi internetimut attaviliisoqarsinnaalluni.

Atuisoq atugassarititaasut immikkut ittut tunngavigalugit attavilerneqassappat, qinnuteqartup piumasqaatit pingasut naammassisimasussaavai:

- Nunaateqarfik nunaateqarfittut pigisatut nalunaarsorsimasussaavoq, kiisalu tassunga atasumik nunaatitut nalunaarsorsimanermut normoqartussaalluni
- Nunaateqarfik ukioq kaajallallugu najugaqarfigineqartussaavoq

- Nunaateqarfik pisortat nalunaarasuartaatitigut attaveqaataannut attavilerneqareersimassanngilaq

Taamaattumik nunaateqarfiit taakku mellembølgekkut nassitsissutit atorunnaarnerinit eqqorneqanngillat. Kisiannili najugaqartut angerlarsimaffimmik avataanniitillutik innuttaasutulli allatut annaasaqarsimanertik misigisassavaat. Nunaateqarfiit piumasaqaatinik taakkuninnga naammassinnissimannngitsut piumasaqaatit immikkut ittut atorlugit atuisunngorsinnaanngillat, taamaattumillu atorunnaarsitsinermit sunniuteqarfiginerlunneqarsimassallutik.

Eqqorneqannginnerpaajusut

Eqqorneqannginnerpaajusut amerlassutsimikkut allanngorarput, kisiannili eqqorneqarnerpaajusunit amerlanerussasut ilimanarpoq. Taakku tassaapput innuttaasut, piffissami sivikinnerusumi sivisunerusumilluunniit imaaniittartut, pinngortitamiittartut allanilluunniit peqquteqarlutik illoqarfiit nunaqarfiillu avataaniittartut. Inuit aallaaniartut aamma inuit ukiup ilaani illuni aasarsiortarfinni, illuaqqani piniariartarfinni imaluunniit illoqarfiit nunaqarfiillu avataanni najugaqarfanni allani najugaqartartut taakkuninnga assersuutissaapput. Inuit taakku FM-ikkut nassitsissutit angusinnaasaasa avataanniitsillutik KNR-radiup aallakaatitaanik tusarnaarsinnaanngillat.

Inuilli taakku amerlassusii nikerartuusarput, aammalu ilaatigut ukiup qanoq ilinera amerlassusiinut apeqqutaasarluni. Tassalu inuk ukiup ilaani FM-ikkut nassitsissutit angusinnaasaanniissinnaavoq, ukiullu ilaani angusinnaanngisaanniittassaaq, tassani inuup sumiinnera apeqqutaalluni. Inuup eqqorneqarneranut aamma inuk piffissami angusinnaasap avataaniitilluni radiukkut aallakaatitanik tusarnaarsinnaanissamut kissaateqarnersoq apeqqutaasussaavoq. Tamakku pissutigalugit amerlassusiisa tutsuiginartumik eqqoriarnissaa ajoraluartumik ajornarpoq.

Eqikkaaneq

Matuma siuliani takuneqarsinnaasutut inuit qanoq amerlatigisut atorunnaarsitsinermit eqqorneqarsimanersut paasissallugu ajornarpoq. Tamanna anguneqassappat immikkut ittumik misissuinissamut aningaasanik immikkoortitsisoqartariaqarpoq.

Kisiannili saaffiginnissutit, pisortatigoortumik oqallinnerit il.il. tunngavigalugit, pingaartumik eqqorneqannginnerpaajusut, soorlu inuit aallaaniartut mellembølgekkut nassitsissutit aqutigalugit radiukkut tusarnaarsinnaanerup atorunnaarsinneqarnerani KNR-radiup aallakaatitaanik tusarnaarsinnaajunnaarput.

Inuit qanoq amerlatigisut KNR-radiup aallakaatitaanik tusarnaarsinnaannginnersut paasilluarniarlugu, sumiiffiit qanoq annertutigisut FM-ikkut nassitsissutit anguneqarsinnaanersut paasilluarneqartariaqarpoq. Taamaattumik Naalackersuisut TELE-mut paasiniaapput, tassanngaanniillu ilisimatitsissutigineqarpoq, FM-ikkut nassitsissutit angusinnaasaannut nunap assinganik suliaqarnissaq teknikkikkut naammassineqarsinnaasooq, tassanilu ilutsit pingaartinneqarput, taamaalillutillu FM-ikkut nassitsissutit angusinnaasaat sukumiisumik takutinneqarsinnaallutik. Takussutissami taamaattumi FM-ikkut nassitsissutit angusinnaasaanni putuusinnaasut sumiissusersineqarsinnaapput, aammalu angusinnaasai qaangissagaanni illoqarfimmiit nunaqarfimmiillu qanoq ungasitsigisumut pinissaq takuneqarsinnaalluni. Aningaasartuutissanik missiliuinermit TELE naliliivoq, FM-ikkut nassitsissutit angusinnaasaannut nunap assiliaq taamaattoq 100.000 koruunit missaanniittut atorlugit suliarineqarsinnaasooq.

Taamatut misissuinissamut aningaasanik immikkoortitsisoqarsimangimmat, Naalakkersuisoqarfik taamatut ittumik misissuisimangilaq.

Teknikkikkut aaqqiissutissat

TELE Naalakkersuisunit kaammattorneqarluni allakkiorpoq, mellembølgekkut nassitsissutinut taarsiinissami teknikkikkut periarfissanik nassuiaateqarfiusumik (ilanngussaq 1-itut ilaliunneqartoq).

Kalaallit Nunaanni radiukkut aallakaatitanik ingerlatitseqqinnissamut periarfissat uku TELE-p misissuiffigisimavai:

- Mellembølgekkut nassitsissutit aqputigalugit radiukkut aallakaatitsineq
- Kortbølgekkut nassitsissutit aqputigalugit radiukkut aallakaatitsineq
- Qaammataasatigut radiukkut aallakaatitanik tigooqqaaneq

Mellembølgekkut nassitsissutit aqputigalugit radiukkut aallakaatitsineq

Mellembølge frekvenseqarfimmi 520-1610 KHz-imit aallartiffeqarpoq. Kalaallit Nunaanni mellembølgekkut radiup aallakaatitaanik siaruarterineq nunap qaatigut pisarpoq, tassalu frekvensit nunami ingerlaarfigisinnaasat aqputigisarpai. Nassitsissutit antenneqarfiillu pitsanngorsarneqarsimatillugit 300-600 km-imut isorartussusilik anguneq ajornangilaq.

Mellembølgekkut nassitsissut nalinginnaasoq pingaarnermik nassitsissuteqarpoq sillimmataasumillu nassitsissuteqarluni, kiisalu nakkutilliissuteqarpoq, nassitsissutip ungasianiit passunneqarneranut nakkutigineqarneranullu atorsinnaasumik. Tamatuma saniatigut nassitsissut innaallagissamik pilersuiveqarpoq, tassungalu atasumik silaannarissaateqarluni.

Antenneqarfippiaq, mellembølgekkut radiup aallakaatitaanik nassiusuineranut atorneqartoq 60 meterimik portussusilimmik saviminiusumik noqarusukkamik napparuteqarpoq, kanngussannik qangatasunik, napparut kaajallallugu 60-100 meterinik ungasissusilinni napasunut oqimaalutaqarfiusunut arlalinnut pituttugaasunik oqimaaloqusersugaasumik. Silap pissusiisa sakkortunerat pissutigalugu atortut immikkoortut ataasiakkaat qajannaasumik suliaapput, taakkulu sananermut aserfallatsaaliuinernullu aningaasartuutitik qaffasinnerutitsipput.

Mellembølgekkut nassitsissutit Kalaallit Nunaata kitaata sineriaani najugaqarfiit amerlanersaat angusinnaassappatsigit, nassitsissutinik arlalinnik sananissaq pisariaqarpoq. Oqaatigineqareersutut siusinnerusukkut mellembølgekkut nassitsissutit, Upernavimmut, Uummannamut, Qeqertarsuarmut, Nuummumut (Kitsissunumut) aamma Simiutamut inissitat atorlugit sullissisoqarpoq, siornatigullu angusinnaasat assinginik angusaqartoqarsinnaassappat, sumiiffinni taakkunani nassitsissutinik sanaqqinnissaq pisariaqartussaavoq.

Oqaatigineqareersutut ilanngussaq 1-imi kitaata sineriaata anguneqarsinnaaneranut, tassalu nassitsissutaasimasut sanaqqinneqarnissaannut aningaasartuutissat sammineqarput. Taakku saniatigut

Tunumi najugaqarfiit qanittuisa anguneqarsinnaanissaat kissaatigineqarpat, taamaattumik sananissamut aningaasartuutissat saniatigut 2.000.000 koruunit missaat aningaasartuutigineqassapput.

Atortut tigooqqaassutit

Atortunik tigooqqaassutinik, mellembølgekkut radiumik tusarnaarnermut atorneqarsinnaasunik suli pisisoqarsinnaavoq, atortullu akit assigiinngitsut tamaasa atorlugit pisiarineqarsinnaapput.

Sanaartornermut aningaasartuutit

Takussutissiaq 1-imi matuma kingulianiittumi mellembølgekkut nassitsissutinik sanaartornermut atatillugu aningaasartuutit qanoq isikkoqarnissaat takuneqarsinnaavoq. Akinut taakkununga missingersuutit tunngavigineqarput. Taamaattumik atortunut ataatsinut akit inaarutaasut aalajangersimasumik isumaqatiginninniarnep kingunerisaanik apparsinnaapput qaffassinnaallutilluunniit.

Aningaasartuutissat	Akigititassat missiliorneqartut
Mellembølgemut antenne 60 m oqimaalutalik, ikkussuunera ilanngullugu	1.500.000 kr.
Illuaqqap antennemut naleqqussaaviup ataatsip ikkussuuneqarnera	175.000 kr.
Mellembølgemut nassitsissut nakkutilliissullu ataatsimoortoq	1.000.000 kr.
Assartuussineq	300.000 kr.
Ikkussuinermit uninnganermullu aningaasartuutit	300.000 kr.
Nassitsissutip ataatsip akia tamakkiisoq	3.275.000 kr.
Nassitsissutit tallimat ikkussuunnerisa akia tamakkiisoq	16.375.000 kr.
Akit katillugit, Tunup anguneqarsinnaalerneranik ilanngullugu	<u>18.375.000 kr.</u>

Takussutissiaq 1.

Ataatsimiititaliap nuna tamakkerlugu aqqiissuteqarnissaq qinnutigisimmamagu, aki tamakkiisoq, Tunup anguneqarsinnaalerneranik ilaqartinneqartoq, nassuiaatip sinnerani atorneqassaaq.

Kortbølgekkut nassitsissutit aqqutigalugit radiukkut aallakaatitsineq

Kortbølge frekvenseqarfimmi 3-30 MHz-imiippoq, aammalu isorartussutsini akunnattumik ungasissulimmut ungasissumullu radiup aallakaatitaanik siaruarterinermit naleqquttuulluni. Kortbølge mellembølgemut naleqqiulluni nunakkut siaruarfiusinnaasut aqqutigalugu siaruarterneqarnissamut naleqqutinngilaq, taamaattumillu pitsaassusia mellembølgemut appasinnerulluni. Kortbølgelli atorneqarnermini angusinnaasai ungasinnerupput, aammalu 300-3000 km-it missaanniilluni.

Angusinnaasaali ullormiit ullormut allanngorartarput, tamatumunngalu kortbølgep maligaasaasa ionosfære-mut, iluaqutissatut tutsuiginanngitsumut seqertarnerisigut siaruarterneqarnera pissutaavoq. Tassalu ionosfære ukiup qanoq ilinera, ullup unnuallu ingerlanerani piffissap qanoq ilinera aammalu seqernup sunniisinaanera malillugu allanngorartarpoq. Taamaattumik naammaginartumik

anguneqarsinnaaneq anguniarlugu frekvensit arlallit atorneqartariaqarput, kisiannili tigooqqaasinnaaneq mellembølgep atorneqarneranut naleqqiulluni taama pitsaatigilersinnaangilaq.

Kortbølgemut ionosfæremut seqertitsisarneq atorneqartarmat, siaruarterisinnaanermi pingaartumik taassuma allanngortarnera apeqquataasarpoq, tamannalu pingaartumik seqernup anitsineranut atatillugu naammattoorsineqarsinnaavoq. Taamatut pisoqartillugu piffissap ilaani radiukkut tusarnaartoqarsinnaajunaavittartussaavoq. Tamanna ulluunerinnaani ajornartorsiutaasarpoq, kisiannili sumiiffiit ilaanni aasaanerani nal. ak. 24-ni qaamasarmat, tamanna nunap avannarpasinnerusortaanut annertuunik sunniuteqarnerlussinnaavoq.

Piffissap ilaani isorartuumut angusaqarsinnaaneq pissutaalluni nassitsissummik ataasiinnarmik pilersitsinissaq pisariaqassaaq. Kortbølgekkut nassitsissut ungerutissianik marlunnik antenneqassaaq, 20-30 meterit missaannik portussusilimmi napparutit saviminiusut sisamaasut akornannut naatinneqarsimasunik. Siusinnerusukkut misissueqqissaarnerit takutippaat, Nuup eqqaani Kitsissut inissiiffissatut naleqquttuusoq (tak. ilanngussaq 2).

Atortut tigooqqaassutit

Kortbølgemut atortut suli pisiarineqarsinnaapput, aammalu 1000 koruunit missaanniit 75.000 koruunit missaannut akeqartinneqarlutik. Kisiannili atortut angallattakkat batteriinillu ingerlatillit pissarsiarineqarsinnaanerat ajornarsiartorpoq. Tamatuma saniatigut aalisariutini nalinginnaasuni kortbølgemik tigooqqaassutinik nalinginnaasumik peqarneq ajorpoq, taamaattumillu atuisut taakku kortbølgekkut radiumik tusarnaarsinnaanissaq kissaatigisimagunikku tigooqqaassutinik pisisussaapput.

Sanaartornermut aningaasartuutit

Takussutissiaq 2-mi matuma kingulianiittumi Nuup eqqaani Kitsissuni kortbølgekkut nassitsissutinik pilersitsinermut aningaasartuutit qanoq isikkoqarnissaat takuneqarsinnaavoq. Akinut taakkununga missingersuutit tunngavigneqarput. Taamaattumik atortunut ataatsinut akit inaarutaasut aalajangersimasumik isumaqatiginninniarnep kingunerisaanik apparsinnaapput qaffassinnaallutilluunniit.

Aningaasartuutissat	Akigititassatut missiliorneqartut
2 stk. dipolantennit marluk, napparutit 30 m-it sisamat akornannut naatinneqartut, ikkussuunneri ilanngullugit	1.500.000 kr.
Illuaqqap antennemut naleqqussaaviup ataatsip ikkussuunneqarnera	175.000 kr.
Kortbølgekkut frekvensinut marlunnut nassitsissutit nakkutilliissutillu ataatsimoortut	2.650.000 kr.
Assartuussineq	350.000 kr.
Ikkussuineranut uninnganermullu aningaasartuutit:	300.000 kr.
Nassitsissutip ataatsip akia tamakkiisoq	<u>4.975.000 kr.</u>

Takussutissiaq 2.

Qaammataasatigut radiukkut aallakaatitanik tigooqqaaneq

TELE-p periarfissat matuma siuliani taaneqartut saniatigut aamma qaammataasat aqutugalugit radiukkut aallakaatitanik tigooqqaasinnaanermi periarfissanik misissuisimavoq, tamatumunngalu atatillugu aaqqiissutissatut periarfissat assigiinngitsut arlallit misissorsimallugit.

Sirius XM

Amerikap avannaani qaammataasat aqutugalugit radiumik tusarnaartoqarsinnaavoq. Aaqqiissutissaq taanna suliffeqarfimmit SIRIUS XM-imit ingerlanneqarpoq, aammalu angerlarsimaffinni, biilini angallatinilu aammalu atortut angallattakkat atorlugit radiumik tusarnaartoqarsinnaavoq.

Qaammataasat, SIRIUS XM-ip atugaasa, ajoraluartumik Kalaallit Nunaat angusinnaanngilaat, taamaatumillu atortut taakku atornerqarsinnaanngillat.

Kiisalu allat sullissinernik taamaattunik Kalaallit Nunaannut anngussinnaasunik neqerooruteqarnersut misissorneqarpoq, taamaattoqanngitsorli paasineqarpoq.

VSAT/TVRO atorlugit aaqqiissutissat

Oqaatigineqareersutut TELE nunaateqarfinnut avinngarusimasuniittunut aaqqiissutissamik neqerooruteqartarpoq, taamaalillunilu taakku angerlarsimaffiminni internetimut attaviliisinaapput tv-kkullu aallakaatitanik isiginnaarsinnaallutik. Atortumik taamaallaat radiukkut tv-kkullu aallakaatitanik tigooqqaasinnaasunik ineriartortitsisoqarnissaa ajornanngilaq. Aallakaatitanik tigooqqaasinnaaniarluni parabol 2,4 meteri, nassitsisinnaasoq tigooqqaasinnaasorlu ikkunneqartussaavoq, tassalu aaqqiissutissaq taanna angallattagaanngilaq, kiisalu ikkussuunnissaa akisungaatsiarpoq. Taamaattumik aaqqiissutissaq taanna eqqorneqannginnerpaajusut angusinnaaniarlugit atornerqarsinnaanngilaq.

Akia: Tigooqqaassummik ataatsimik ikkussinermut 60.000 koruuniniit 75.000 koruuninut.

INMARSAT

Båndbredde-p amippallaarnera pissutigalugu INMARSAT-M, -Mini atortullu allat aqutugalugit radiup aallakaatitaanik toqqaannartumik tigooqqaasoqarsinnaanngilaq. Taamaattorli aallakaatitat podcasts-itut aaneqarsinnaapput, tamatumalu kingorna tusarnaarneqarsinnaallutik. Tamannali pisinnaassappat qarasaasiamik atuisinnaanissaq pisariaqarpoq, tamatumalu peqatigisaanik radiup aallakaatitaanik toqqaannartumik tigooqqaasoqarsinnaanngimmat, aaqqiissutissap taassuma pinngortitami atornerqarsinnaanera killeqarpoq.

Akia: INMARSAT-M-imut 25.000 koruuniniit 30.000 koruuninut aamma INMARSAT-MINI-M-imut 10.000 koruunit.

Iridium

Taamatutaaq Iridium aqutugalugu radiumik tusarnaartoqarsinnaanngilaq. Taamaattorli aallakaatitat podcasts-itut aaneqarsinnaapput, tamatumalu kingorna tusarnaarneqarsinnaallutik. Tamannali pisinnaassappat qarasaasiamik atuisinnaanissaq pisariaqarpoq, tamatumalu peqatigisaanik radiup

aallakaatitaanik toqqaannartumik tigooqqaasoqarsinnaanngimmat, aaqqiissutissap taassuma pinngortitami atorreqarsinnaanera killeqarpoq.

Akia: Tigooqqaassummut angallattakkamut 10.000 koruunit missaanni, tigooqqaassummut 30.000 koruunit. Taakku saniatigut atuisuunermut akitsuut qaammammut 150 koruuniusoq aamma sianerermut akitsuut minutsimut 6,30 koruuniusoq².

BGAN

BGAN aqqutigalugu radiumik tusarnaartoqarsinnaavoq. Kisiannili Kalaallit Nunaanni BGAN-ip tiguoneqarsinnaanera annikillimavoq, taamaattumillu ullumikkut taamaallaat Nanortalimmiit Aasiannut tusarnaarneqarsinnaalluni. BGAN-imut terminali 10.000 koruunit missaannik akeqarpoq. Taakku saniatigut qaammammut atuisuuneq 170 koruuneqarpoq, aammalu attaveqarnermut minutsimut akiusumut attaveqarnerup sukkassusia malillugu allanngorarpoq.

Akit imatut isikkoqarput:

Minutsimut Streaming 32 kbps	17,96 kr.
Minutsimut Streaming 64 kbps	33,11 kr.
Minutsimut Streaming 128 kbps	57,63 kr.
Minutsimut Streaming 256 kbps	100,92 kr.

Eqikkaaneq

Matuma siuliani takuneqarsinnaasutut teknikkikkut aaqqiissutissat assigiinngitsut, nunami FM-ikkut nassitsissutit angusinnaanngisaanni radiup aallakaatitaanik ingerlatitseqqinnermut atorreqarsinnaasut arlaqarput.

Mellembølgemut aaqqiissutissaq toqqarneqassappat, nassitsissutit tallimat pilersinneqarnissaat pisariaqarpoq. Kisiannili angusinnaasai pitsaalluinnartuussapput.

Kortbølgemut aaqqiissutissaq toqqarneqassappat nassitsissummik ataasiinnarmik sanasoqassaaq, kisiannili angusinnaasai mellembølgep angusinnaasaatut pitsaatigissanngillat. Kortbølgep ajoqutissartaa tassaavoq tigooqqaassutit angallatini aalisariutinilu atortutut nalinginnaasutut atorreqanngimmata, tigooqqaassutilli 1000 koruunit missaannik akilerlugit pisiarineqarsinnaapput.

Qaammataasatigut aaqqiissutissami, radiumik toqqaannartumik tusarnaarfiusinnaasumi atortut tigooqqaassutit amerlasoorsuarnik aningaasartuuteqarfiusussaapput. Kiisalu aaqqiissutissanit arlallit angallattagaannginnerat ajornartorsiutaavoq, taamaattumillu pinngortitamiinnermi radiumik tusarnaarsinnaanermik kissaateqarneq naammassineqarsinnaanngilaq.

² Iridium-imik aamma BGAN-imik atuinermet aningaasartuutit US\$-imiit 1 USD-p nalinganut naatsorsoqqitaavoq = 6,50 koruunit. Taamaattumik aningaasat nalingisa allanngorarneri malillugit akiusut allanngorartarput.

Tamanna pissutigalugu qaammataasatigut aaqqiissutissaq periarfissatut naammassineqarsinnaanngitsutut naliliiffigineqarpoq, pinngortitamiinnermi KNR-radiomik tusarnaarnissamut pisariaqartitsinerit pingaarnerit naammassineqarsinnaanngimmata.

Matuma kinguliani *Takussutissiaq 3-mi* teknikkikkut aaqqiissutissani assigiinngitsuni iluaqutissat ajoqutissallu takuneqarsinnaapput.

	Mellembølge	Kortbølge	VSAT	INMARSAT	Iridium	BGAN
Radiumik toqqaannartumik tusarnaarsinnaaneq?	Aap	Aap	Aap	Naagga	Naagga	Aap
Eqqugaasunut pingaanneginnernerut atorineqarsinnaasoq?	Aap	Aap	Naagga	Naagga	Naagga	Naagga
Angusinnaasat	Annertungaatsiarput	Annikingaatsiarput	Annertungaatsiarput	Annertungaatsiarput	Annertungaatsiarput	Taamaallaat Aasiaat kujataanni

Takussutissiaq 3. Sirius XM ilanngunneqanngilaq, aaqqiissutissaq taanna Kalaallit Nunaanni atorineqarsinnaanngimmat.

Mellembølgemut atortut siornatigut atorineqarsimasut angusinnaasaasa assingini angusaqarsinnaanissaq kissaatigineqarpat, sumiiffinni tallimani siornatigut nassitsiveqarsimasuni mellembølgekkut nassitsissutinik pilersitsinissaq kisimi atorineqarsinnaasutut periarfissaavoq. Tamatuma saniatigut Tunumi nassitsissummik pilersitsisoqartussaavoq. Tamatumunnga taarsiullugu kortbølgekkut nassitsissutinik sanasoqarsinnaavoq – atortullu taamaattut angusinnaasaasa killeqarnerat ilaatinneqartussaavoq.

Nassitsissutinik ikkussuineq ingerlatsinerlu

Nalunaarasuartaatigut atassuteqarneq nalunaarasuartaatigullu kiffartuussinerit pillugit Inatsisartut peqqussutaanni nr. 17-imi, 20. november 2006-imeersumi § 5-imi sanaartornissamut, nalunaarasuartaatigut atassuteqarnermut attaveqaatinik ingerlatsinissamut aamma nalunaarasuartaatigut kiffartuussinernik neqerooruteqarnissamut akuersissuteqarnissamut Naalakkersuisut periarfissinneqarput.

Kiisalu TELE Greenland A/S-imut akuersissut pillugu Namminersornerullutik Oqartussat nalunaarutaanni nr. 18-imi, 22. november 1999-imeersumi § 1, imm. 1-ip immikkoortuani 5-imi allassimavoq, akuersissummik

piginnittoq (TELE Greenland A/S) ilaatigut radiukket fjernsynikkullu aallakaatitanik nalunaarasuartaatitigut aqqusersuutit aqqutigalugit ingerlatitseqqinnissamut akuerineqartoq.

Taamaattumik mellembølgekkut nassitsissutinik pilersitsinissaq ingerlatsinissarlun TELE-mut akuersissutip iluaniippoq, taamaattumillu TELE atortunik pilersitsinissamik ingerlatsinissamillu isumaginnittussaavoq.

Aningaasaqarnermut sunniutissat

Matuma siuliani aaqiissutissatut siunnersuutigineqartut arlaalluunniit toqqarneqaraluarpat, innuttaasut angerlarsimaffimmik avataaniitillutik radiumik tusarnaarsinnaaneriniq qulakkeeriniarnermi arlalinnik aningaasaqarnikkut sunniuteqartussaavoq.

Takussutissiaq 4-mi matuma kingulianiittumi aaqiissutissat atuisunut ataasiakkaanut aningaasaqarnikkut sunniutissaat takuneqarsinnaavoq.

	Mellem- bølge	Kortbølge	VSAT	INMARSAT	Iridium	BGAN
Atuinermi minutsimut akitsuut koruuninngorlug u	0	0	0	*	3,75-49	17,96-100,92
Tigooqqaassutit akii koruuninngorlugi t	400-miit	400-miit	60.000 - 75.000	10.000 - 30.000	10.000	10.000
Atuisumut qaammammut aningaasartuutit koruuninngorlugi t	0	0	0	*	150	170

*Takussutissiaq 4. Akit tamarmik DKK-jupput. Sirius XM ilanngunneqanngilaq, aaqiissutissaq taanna Kalaallit Nunaanni atorveqarsinnaanngimmat. *Paasisutissat pissarsiarineqarsinnaanngillat.*

Teknikkikkut aaqiissutissanut immikkoortumi oqaatigineqareersutut takuneqarsinnaavoq, mellembølge aamma kortbølge atorlugu aaqiissutissat kisimik pinngortitami radiumik tusarnaarsinnaanissamik kissaateqarnermut aaqiissutaasinnaasut. Kisiannili mellembølge aamma kortbølge atorlugu aaqiissutissani pilersitsinermut aningaasartuutit amerlasussaapput, tamatumalu saniatigut ingerlatsinermut arlalinnik ingerlaavartunik aningaasartuuteqartoqartartussaalluni.

Ingerlatsinermut aningaasartuutitut tunngatillugu TELE ilisimatitsivoq, siornatigut mellembølgekkut nassitsissutinut ukiumut ingerlatsinermut aningaasartuutaasartut 3.100.000 koruunit missaannik amerlassuseqartarsimasut. Tamatuma saniatigut Tunumi mellembølgekkut nassitsissutip

ingerlanneqarneranut atatillugu aningaasartuutissat ilanngunneqassapput, taakkulu ukiumut 465.000 koruunit missaannik akeqartussaapput. Tassalu nuna tamakkerlugu ukiumut ingerlatsinermut aningaasartuutissat 3.565.000 koruuniussapput. Kiisalu TELE-mit ilisimatitsissutigineqarpoq, kortbølgekkut nassitsissutit ingerlanneqarnerinut aningaasartuutissat ukiumut 500.000 koruunit missaanniinnissaat naatsorsuutigineqartoq.

Aningaasartuutissatut naatsorsuutigineqartut *Takussutissiaq 5-imi* matuma kingulianiittumi takuneqarsinnaapput.

Nassitsissut	Pilersitsinermut aningaasartuutit	Ukiumut ingerlatsinermut aningaasartuutit
Mellembølge	18.375.000 kr.	3.565.000 kr.
Kortbølge	4.975.000 kr.	500.000 kr.

Takussutissiaq 5. Pilersitsinermut aningaasartuutini missingersuutit tunngavigineqarput, aammalu ikkussuinermut ataatsimut akiusussamut inaarutaasumut tunngatillugu isumaqatiginninniarnert aalajangersimasut kingunerisaanik akit apparsinnaapput qaffassinnaallutilluunniit.

Tassalu *Takussutissiaq 5-imi* takuneqarsinnaavoq, kortbølgekkut nassitsissummut taarsiullugu mellembølgekkut nassitsissummik pilersitsinissaq 13.400.000 koruuninik akisunerussasoq. Kiisalu mellembølgekkut nassitsissut ukiumut ingerlanneqarnermini kortbølgekkut nassitsissummit 3.065.000 koruuninik akisunerusoq takuneqarsinnaavoq.

Aningaasalersueriaasissat

Matuma siuliani immikkoortumi takuneqarsinnaasutut sananermut aningaasartuutissat 5 aamma 18 mio. koruunit akornanni amerlassuseqartussaapput, kiisalu ingerlatsinermut aningaasartuutissat 500.000 koruunit aamma 3,5 mio. koruunit akornanni amerlassuseqartussaallutik. Taamaattumik aningaasalersueriaasiusinnaasuni arlalinni iluaqutissat ajoqutissallu imminnut oqimaalutarnissaat iluaqutaasinnaavoq. Oqimaalutaanermi sananermut aningaasartuutit aningaasalersorneqarnissaasa aamma ingerlatsinermut aningaasartuutit aningaasalersorneqarnissaasa akornanni immikkoortitsinissaq iluaqutaasinnaavoq.

Aningaasalersueriaasissanik toqqaaniarnermi pingaarnertut periarfissat sisamaapput: Siullermik akuersissummik pigisaqartup aningaasartuutininut akiliinissaannik Naalakkersuisut peqqusisnaapput, aappaattut pisortat aningaasalersuinerat atorineqarsinnaavoq, pingajuattut atuisut aningaasalersuinerat atorineqarsinnaavoq, sisamaattullu matuma siuliani tunngavissatut taaneqartut kattunneqarnissaat toqqarneqarsinnaavoq.

Akuersissummik pigisaqartup aningaasartuutissanut akileeqquneqarnissaa

Mellembølgekkut nassitsissutininut atorunnaarsinneqartunut taartissanik sananissaq ingerlatsinissarlu oqaatigineqareersutut TELE-mut akuersissutip iluaniippoq. Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaanni nr. 17-imi, 20. november 2006-imeersumi § 5, imm. 3-p immikkoortuata sisamaanni allassimavoq, ilaatigut akuersissummik pigisaqartup suliassanik immikkut ittunik immikkut isertitaqaatigisaqarfiginngisaminik imaluunniit

toqqaannartumik amigartooruteqarfigisaminik suliaqarnissaanut pisussaaffiliisumik Naalakkersuisut akuersissummut atatillugu maleruagassiorsinnaasut.

Tamatuma kingunerisaanik mellembølgekkut nassitsissutinut taartissanik pilersitsinissamut ingerlatsinissamullu Naalakkersuisut tunngaviusumik TELE-mut peqqussuteqarsinnaapput, kisiannili periarfissaq taanna arlalinnik sunniuteqartussaavoq.

TELE aningaasartuutininik taama amerlatigisunik aningaasartuuteqarnissamut peqquneqassappat, tamanna TELE-p sinneqartoorutissaanut sunniuteqarnerluttussaavoq. Piginnittup tungaaniit TELE-p ukiumut aalajangersimasunik sinneqartootarnissaa piumasarineqarsimammat, TELE-p annaasaminik allatigut matussusiinissamut pinngitsaalineqarnissaa tamatuma kingunerissavaa, soorlu akinik akigitaasunillu qaffaanikkut imaluunniit kiffartuussinerup qaffasissusianik appaanikkut. Tamatuma kingunerisaanik suliaqarnissaanut taamaattut nalunaarasuartaatinik niueruteqarnermi akinik aalajangersaasarnermik ersarlunnerulersitsisussaapput.

Pisortat aningaasalersuinissaat

Pilersitsinermut aningaasartuutininik pisortat aningaasalersuinissaat

Pisortat pilersitsinermut aningaasartuutininik aningaasalersuinissaat toqqarneqarpat, tamanna pisortat aningaasaqarnerannut artukkiisussaavoq.

Tamatumunnga atatillugu Aningaasaqarnermut Naalakkersuisoqarfik ilisimatitsivoq aningaasanik atoriaannarnik soqanngitsoq, tamatumani Ineqarnermut, Angallannermut Attaveqarnermullu Naalakkersuisoqarfiup ilumini aningaasat nassaarisinnaanngippagit. Tamanna ajornarpoq, aningaasat pissarsiarineqassappata politikikkut allaanerumumik tulleriarisooqartariaqartussaammat imaluunniit akileraarutit qaffattariaqartussaallutik. Akileraarutilli qaffannissaat Naalakkersuisut sulisartunut akileraarutininik appaanissamik anguniagaqarlutik ilungersuuteqarnerannut tulluutinnilaq.

Pisortat ingerlatsinermut aningaasartuutininik aningaasalersuinissaat

Nassitsissummik ataatsimik arlalinnilluunniit ingerlatsinermut tunngatillugu eqqumaffigissallugu pingaaruteqarpoq, aningaasat siornatigut mellembølgekkut nassitsissutit ingerlanneqarnerinut atorneqartarsimasut amerlanersaat tv-kkut nassitsissutit digitaliusut ingerlanneqarnerinut atorneqarsimammata. Kisiannili ullumikkut ukiumut 270.000 koruunit missaanniittut silassap VHF-ikkut ullup unnuallu ingerlanerani sisamariarluni aallakaatinneqartarneranut atorneqartarput. KNR-radiup aallakaatinneqarnerata ingerlateqqittarneratigut aningaasat taakku ingerlatsinermut aningaasartuutininik aningaasalersuinermut atorneqarsinnaapput. Kisiannili tassani taamaallaat ilaannaasumik aningaasalersuisoqartussaavoq, taamaattumillu mellembølgekkut nassitsissutit atorlugit aaqqiinissaq toqqarneqassappat, sinnerisa aningaasalersornissaannut ukiumut 3.295.000 koruunit nassaariarneqartarnissaat pisariaqartussaavoq. Kortbølgekkut nassitsissutit atorlugit aaqqiinissaq toqqarneqassappat, sinnerinut aningaasalersuutissat ukiumut 230.000 koruunit pisariaqartinneqassapput.

Atuisut aningaasalersuinissaat

Atuisut pilersuinermut aningaasartuutininik aningaasalersuinissaat

Atuisut akiliisinnerqarneranni pisortat aningaasaataasa artorsinneqannginnissaat iluaqutissartaavoq. Najoqqutassamili tassani ajornartorsiutit arlaqarput. Siullermik radiukku aallakaatitanik tigooqqaasinnaaneq teknikkikkut killilersorneqarsinnaanngilaq, taamaattumillu atuisut akiliisartut atuisullu akiliinngitsoortartut akornanni immikkoortitsisoqarsinnaanngilaq. Tamanna pissutigalugu atuisunut akiliisitsisarnerpiamik, soorlu tv-nut antenneutileqatigiiffinit namminersortunit ilisimaneqartumik atuutsitsilernissamut tunngavissaqartoqanngilaq. Aamma atuisunik akiliititsisarnermik atuutsitsilernissaq aaqqiussuunerup aqunneqarneranut aningaasartuutissarpaalunnik nassataqarsinnaavoq.

Naatsorsueqqissaartarfiup naatsorsugai malillugit 2012-imi Kalaallit Nunaanni inoqutigiit 22.223-t nalunaarsorneqarsimapput. Atuisut akiliitinnerqartarnerat, nunatsinni inoqutigiinnit tamanit akilerneqartartoq tunngavigalugu pilersitsinermut aningaasartuutit aningaasalersorneqarnissaat kissaatigineqarpat, aammalu mellembølge atorlugu aaqqiissutissaq toqqarneqarpat inoqutigiit ataatsit 826,85 koruunit missaannik ataasiaannartumik aningaasartuuteqassapput, aammalu kortbølge atorlugu aaqqiissutissaq toqqarneqarpat 223,87 koruunit missaannik aningaasartuuteqassallutik. Tamatumunnga taarsiullugu pilersitsinermut aningaasartuutit ukiunut arlalinnut agguarneqarsinnaapput.

Atuisut ingerlatsinermut aningaasartuutitut aningaasalersuinissaat

Atuisut ingerlatsinermut aningaasartuutitut aningaasalersuineranni assersuutigalugu pilersitsinermut aningaasartuutitut atuisut aningaasalersuineranni iluaqutissat ajoqutissallu assingi anguneqassapput. Tassalu atuisut akiliisarnerannut aaqqiussuinermi aqutsinermut aningaasartuutit aningaasartuutitut matuneqartussanut naleqqiullutik qaffasittussaapput. Taamatuttaaq atuisut innuttaasullu sinnerisa akornanni immikkoortitsinissaq ajornakusoorsinnaavoq.

Ingerlatsinerup atuisut akiliuteqartinneqartarnerat, inoqutigiit tamarmiusut akiliiffigisassaat tunngavigalugu aningaasalersorneqarnissaa kissaatigineqarpat, aammalu mellembølge atorlugu aaqqiissutissaq toqqarneqarpat inoqutigiinnut ataatsinut aningaasartuutissat ukiumut 160,42 koruunit missaanniissapput, aammalu kortbølge atorlugu aaqqiissutissaq toqqarneqarpat ukiumut 22,50 koruunit missaanniissallutik.

Najoqqutassaq ataatsimoortitsiviusoq

Periarfissat pingajuanni najoqqutassat assigiinngitsut ataatsimoortinnerqarput. Aningaasalersueriaatsit pingaarnerit pingasuummata, aammalu sanaartornermut ingerlatsinermullu aningaasartuutissat marluummata, *Takussutissiaq 6-imi* takuneqarsinnaasutut najoqqutassat ataatsimoortitsiviusut arfinillit assigiinngitsut ilusilerneqarsinnaapput:

Aaqqiissutissat ataatsimoortitsiviusut	Pilersitsinermut aningaasartuutit	Ingerlatsinermut aningaasartuutit
1	Pisortat aningaasalersuinerat	Atuisut aningaasalersuinerat
2	Pisortat aningaasalersuinerat	Akuersissummik pigisaqartoq
3	Atuisut aningaasalersuinerat	Pisortat aningaasalersuinerat
4	Atuisut aningaasalersuinerat	Akuersissummik pigisaqartoq
5	Akuersissummik pigisaqartoq	Pisortat
6	Akuersissummik pigisaqartoq	Atuisut aningaasalersuinerat

Takussutissiaq 6.

Assersuutigalugu pilersitsinermut aningaasartuutit Nunap Karsia aqutugalugu aningaasalersorneqarsinnaapput, aammalu ingerlatsinermut aningaasartuutit atuisut akiliisinneqartarnerisigut aningaasalersorneqarsinnaapput, tamannalu *Takussutissiaq 6-imi* periarfissaq 1-imi takutinneqarpoq.

Ataatsimut isigalugu aqqiissutissani ataatsimoortitsiviusuni tamani iluaqutissat ajoqutissallu matuma siuliani immikkoortumi allaaserineqartut atorineqassapput. Aqqiissutissami ataatsimoortitsiviusumi 1-imi assersuut tikeqqikkaanni, pilersitsinermut atatillugu pisortat aningaasaqarnerannut artukkiisoqassaaq, kisiannili piffissami ingerlatsiviusumi taamaassanngilaq. Tassani ajornartorsiut matuma siuliani taaneqartoq tikiinneqassaaq, tassalu aqqiissuussinerup taamaattup aningaasat akilersinneqartut amerlassusiinut naleqqiulluni akisunera.

Eqikkaaneq

Paasiuminassuseq anguniarlugu aningaasalersuinissamut periarfissani assigiinngitsuni iluaqutissat ajoqutissallu matuma kinguliani *Takussutissiaq 7-imi* eqikkarlugit takutinneqarput:

Aningaasalersueriaaseq	Iluaqutissat	Ajoqutissat
Akuersisummik pigisaqartup peqquneqarnissaa	Pisortat aningaasaqarnerannut artukkiissanngilaq. Aqutsinermut aningaasartuutit ikittuussapput.	TELE-p tunisassiaanut akit qaffasinnerulissapput. Nalunaarasuartaateqarnermi akinik aalajangersaasarnermik paasiuminaannerulersitsissaaq.
Pisortat aningaasalersuinerat	Aqutsinermut aningaasartuutit ikittuussapput.	Pisortat aningaasaqarnerannut artukkiissaaq.
Atuisut aningaasalersuinerat	Pisortat aningaasaqarnerannut artukkiissanngilaq	Aqunneqarnera akisussaaq. Atuisut akiliisartut akiliisanngitsullu immikkoortinneqarsinnaanissaat ajornakusuussaaq.
Najoqqutassat ataatsimoortitsiviusut	Pingaarnertut iluaqutissat ajoqutissallu assigiinngitsut kissaatit malillugit ataatsimoortinneqarnissaat ajornarunnaassaaq.	Aningaasalersueriaatsini pingaarnerni pingasuusuni iluaqutissat ajoqutissallu assiginik atugaqarfiussaaq.

Takussutissiaq 7.